

Angelle Stamper lo tey pa firma su buki 'Cicatriz di Mirada'



ORANJESTAD (AAN): Diasabra awo, dia 4 di februari 2017, Angelle Stamper lo ta presente na Vandorp Dakota di 11or di mainta pa 1or di merdia pa firma su buki 'Cicatriz di Mirada' y ta invita un y tur cu ta desea ainda un copia y firma di su buki pa pasa. Algun luna pasa Angelle a lanza 'Cicatriz di Mirada' desde Hulanda. Na cuminsamento di e aña aki tabatin e presentacion oficial di e buki. E anochi tabata un anochi bunita cu a cay na agrado di e publico presente, unda Angelle a presenta varios poema di su buki y a termina cu bautismo di e buki cu petalos di rosa. Osvaldo Correa a compaña e durante tres poema. Su primo chikito Liam Kock, tambe a recita dos poema. E presentacion a tuma luga na Renaissance Marketplace den aire liber.

'Cicatriz di Mirada' ta un album di poesia conteniendo poema na Papiamentu, Ingles, & Hulandes acompaña pa potretnan saca na Aruba pa Angelle su mes persona. Comentarionan cu Angelle a ricibi tocante e buki ta cu e poemanan ta hopi profundo y diferente, pero tambe cu e buki ta agradabel pa lesa. 'Cicatriz di Mirada' ta abarca un periodo di 10 aña cu Angelle ta activo den mundo literario y mundo di fotografia. E titulo 'Cicatriz di Mirada' ta refleha e hecho cu experiencianan den bida ta laga marcanan atras, of miho bisa cicatriznan, den e manera cu un persona ta mira e.o. bida, amor, mundo, y nan relacion cu diferente persona. Cada personanan tin su propio cicatriznan cu e ta acumula di e prome te na e ultimo rosea. E mensahe principal cu Angelle kier comparti pa medio di Cicatriz di Mirada ta skirbi den e prome frase den e buki, cual ta bisa: Lagrima cu cay lo seca prome cu toca



suela.

Angelle a ricibi diferente entrevista tocante su buki e.o. door di Bookish Plaza, Chaerloo Agency, Biblioteca Nacional Aruba, TeleAruba, Top FM, Power FM y Hit FM. Tambe a presenta algun poema na e celebracion di e di 4 aniversario di Dutch Caribbean Book Club den Theater De Vaillant na Den Haag Hulanda den november aña pasa. Siman pasa Angelle a presenta algun poema na e Poetry Night Star Gazer di Basha Foundation na Sero Colorado Light House. Ariba Celebracion di Dia di Betico ultimo Angelle tambe tabata presente cu su bukinan na Plaza Betico.

Den pasado Angelle a declama poesia na diferente evento cultural, exposicion di arte y actividad formal tanto na Aruba y den exterior. Angelle a participa diferente biaha na e competencia literario "Arte di Palabra" na Aruba y na Corsou. Na diferente ocasion a bay cu premio di prome y segundo lugar pa su poemanan "Garnachi di Speranza" y "Bo no mag di bay". Na 2011 Angelle tabata un di e 25 hobennan cu haya reconocimiento en conexion cu celebracion di 25 aña di Status Aparte, pa medio di exposicion Aruba Dushi Tera "Chikito y simpel bo por ta pero si respeta". E mesun aña Angelle a presenta su poema "Freedom within" na desvelo di estatua di Anne Frank den Wilhelmina Park. 'Cicatriz di Mirada' ta un proyecto financia pa UNOCA Aruba.

Pueblo di Aruba di keda invita pa bin topa cu Angelle Stamper diasabra awo na Vandorp Dakota pa adkiri y/of laga firma nan copia di 'Cicatriz di Mirada'.